

嘉靖惠安縣志

二

K295.74

3

共 二 冊
八 元

(志)七九・一・四二〇 (虹口)

惠安縣志卷之八

邑人淨峯張岳維喬



水地置塾以規居邑堂級既崇廉隅翼翼奔趨人
顧瞻竦息孰反而思我躬民極政出有經令孚不忒
嚮明而照纖毫必悉古稱親民於焉作式志公宇

縣治宋太平興國六年建中爲正廳內有堂曰中庸
曰歲寒曰瑞渫曰瑞桂又有見梅亭丞廳在縣門外
之西南熙寧中創紹興中重修後有亭扁曰西爽淳
熙丙午丞許鈞再建扁其堂曰簡靜簿廳初在縣門
外後乃遷于皇華驛東之雙荔亭尉廳在縣門外西

熙寧中尉章術廢海道巡捕司始請于郡撤舊宇而更新之廳陰有池南北爲二亭南曰四美北曰望雲元正元丙子凡縣治之屋宇俱燬于寇乙酉復建至正辛酉又燬國朝洪武四年知縣時汝楫闢廳事東爲典史廳西爲庫房其後爲燕堂寢室翼以兩廊六吏曹分列之前爲儀門其外爲譙樓臨于通衢樓之下爲大門丞簿衙在兩廊之後典史衙在譙樓之左吏舍在右司獄在吏舍之西南宣德七年知縣高顯重建儀門正統七年知縣閉禎重建譙樓及修廳事廊廡之屬先是邑有遺讖言不利改作自宋以來

皆隨時繕葺隘狹苟簡不稱觀美至成化壬寅知縣張桓重新縣治部置方位無易於初而規橫視昔加大其後張以太僕丞召去代者虞坤爲之立記

論曰聞之張令興造木取於深山石取於廢寺之故會計徭役贏奇及贖金之餘民戶出錢戶不過三十故功成而人不知勞之及已皆以爲張令之才實然余嘗思之成化以前屢有賢令愛養休息積其全力以及於張如強盛之人驟侵肌體自能勝之不覺也若使疋羸么麼拔其一髭一髮則號且病矣由是言之興作難易顧民力盈虧何如爾才安能獨售哉

分巡福寧道在縣治左即宋皇華驛洪武八年知縣
安景賢建初爲提刑按察司分司十五年設安溪惠
安行僉事一員以蒞之十七年省罷二十四年改爲
漳泉道二十九年改今名

布政司分司即稅課局舊址弘治中建其規模略如
福寧道而深邃不及

府館在龍津橋南舊爲南塔堂弘治中改建

錦田驛在縣治西南即元龍山驛舊址宋皇華驛在
縣治左四十五步元遷于今所我朝因之洪武八
年建中爲堂以待賓旅其左右翼室及兩廊共十間

爲往來者歇宿之所前爲儀門門左右爲庫房驛丞
廳事在儀門外之左通運所在右驛丞兼掌之其外
爲大門臨于通衢中堂後花臺有石三塊色蒼翠可
玩絕勝太湖相傳永樂間中貴人三寶得之外國以
重大勞費故置于此今亡其一

崇武千戶所隸永寧衛即宋小兜巡檢寨爲自海入
州界首 國初爲巡檢司洪武二十年江夏侯周德
興經略沿海地方設立城池乃移巡檢司于小岞而
置千戶所城周圍七百三十七丈基厚一丈三尺高
連女牆二丈一尺爲窩舖二十有六城四方各闢一

門建樓其上二十八年千戶錢忠重修門樓永樂十五年都指揮谷祥等增舊城高四尺及砌東西二月城各高二丈五尺

峯尾黃崎獺窟小岞四巡檢司皆洪武二十年江夏侯周德興爲備倭而設舊僅有沙格小兜二司至是移沙格於峯尾移小兜於小岞增置黃崎獺窟二司與崇武千戶所皆控制大海其巡警守備各畫地爲界每司城垣周圍一百五十丈厚一丈二尺高連女牆二丈爲窩舖凡八南北關二門建樓其上城中各有營房三十間以居弓兵

河泊所在輞川灣洪武十六年設三十二年八月衙
宇爲海潮漂沒遂於民居署事正德中乃即舊址全
土再建

惠安場鹽課司隸都轉運鹽司在縣南玉埕元至元
十六年始置惠安場管勾司至大二年改爲司命司
國朝洪武初爲惠安場中爲廳事廳之東西爲幕廳
後爲茶亭燕堂堂左右各有翼室廳事前翼以兩廊
前有儀門又前爲外門幕廳後爲場官之公廨洪武
十五年以爲轉運鹽司分司二十五年更爲惠安場
鹽課司就分司西幕署事轄鹽倉八近制竈戶不辦

鹽鹽倉皆廢

陰陽學在縣治南洪武十八年設

醫學在儒學之北以上二學今皆廢爲民居

際留倉在縣治內簿廳前即宋常平倉洪武初改今名正德十四年知縣陳逅改建知縣衙之西北歲貯糧米以爲官吏孤老月餼

縣學倉在儒學內歲貯師生俸廩

崇武千戶所倉在所之西北舊一座共二廩計六間永樂二年千戶錢忠增建五座共七廩計二十一間歲貯糧米以備官軍俸糧

預備倉二所一在縣南十八都嶼頭村一在縣北七都香林保洪武二十四年建永樂二年官給價鈔收糴稻穀命各里老人領其事荒年散之至秋成還官近官無糴本二倉不復儲穀際留旁設二廩以贖罪米折穀實之

論曰古者爲國必有九年三年一年之積無一年之積以爲非其國也近制縣十里以下令積穀萬五千石吾邑爲里二十有五如制當積穀五萬有奇民口大約不及四萬甚荒之年其不能自給者半以五穀有無相補足食所乏者不過冬春之間四月爾八月

食穀五斗爲穀二石糜穀亦不及四萬出所積以賑之可不至於流散矣況其飢未至甚而積尚多也其可忽諸

申明旌善二亭俱洪武中建申明亭日令老人一人坐之民犯小罪可以道理勸諭者老人與之詳解律令大誥等本意使之自改旌善亭則榜書民間善惡以示勸懲初建時申明亭在名賢坊內旌善亭在登龍坊內嘉靖四年知縣萬夔改建龍津橋之北舊制每都各有申明旌善二亭今多廢弛

舖舍宋有塗嶺居仁上田三舖相去各二十五里舖

有節級供申急遞等差 國朝增爲白水塗嶺驛坂
居仁縣前盤龍上田自北而南相去各十里中爲郵
亭亭之後爲舖廳旁爲舖舍前爲門繚以周垣每舖
有舖司以舖曆舖兵專主走遞又設舖長一人管勘
各舖雜物及稽遲文字洪武二十一年又設前埔黃
田青山崇武以傳達崇武千戶所文字

存恤院宋有居養院一在縣北烏石隔一在江店市
一在上田以收養鰥寡廢疾之人 國初設於縣治

南錦田驛北改今名成化中知縣張桓遷於樓山之
南唯不人疾者得入之其鰥寡孤獨則給之月食居

住任其便

墩臺洪武中以倭賊登岸量地里遠近於濱海高山絕頂上設立中有望樓守瞭者居之夜遇寇則舉火晝遇寇則舉烟使百數十里之內得以知寇至而爲之備初用民夫後改屬衛所以軍代之正統中乃令巡檢司撥弓兵代軍士而衛所得以稽勤惰吾邑有墩臺二十三所曰下朱曰爐頭曰蕭山曰後黃曰峯尾曰高山曰大山曰下頭曰海頭曰後任曰黃崎曰馬頭曰尖山曰埕埭曰小岞曰大岞曰赤山曰古雷曰青山曰獺窟曰柯山曰白崎曰白沙自縣東北抵

東南沿海一帶近時法令不嚴稍稍弛壞至有睥睨其石以他用者

義塚在北郭外宋嘉定中令張豹變創以葬死而無歸者今因之

論曰吾邑不食之地多民有地以葬而患在不肯葬與葬之苟且掘坎未及深即覆土其上往往墮圯至於暴露甚或拘風水歲月權措荒山久之不克葬亦至暴露古者方春掩骼宜倣此意令甲伍以春月察視有不肯葬與葬之苟且至暴露者罰其子孫無子孫則官爲收埋之使四郊無暴骨之慘是亦及物一

端云

教場一所周圍共二百九十四步在南郭外里許正
德六年建以操閱民壯

惠安縣志卷之八

惠安縣志卷之九

邑人淨峯張岳維喬

帝隲民彝經緯萬端總以五典慎徽其難民生異稟
維教斯安乃歛才俊建學立官筭籌攸敘契教在寬
敦崇實行浮華必刊矧茲遐邑人文猶抗深惟懋訓
肅我衣冠志學校

廟學興廢始末

宋初置縣時即立學在邑之西乾興初令李畋以大
理丞知是邑下車謁廟見其傾圯乃謀於邑人四明
從事張惟德即舊基改作象先聖及十哲于堂繪從